



Universitätsbibliothek Paderborn

Johannis Trithemii Spanheimensis Primo, Deinde D. Iacobi Maioris Apvd Herbipolin Abbatis, viri suo aeuo doctiss. ... Partis Opera Historica, Qvotqvot hactenus reperiri potuerunt, omnia

Partim E Vetvstis Fvgientibusque editionibus reuocata, & ad fidem
Archetyporum castigata; partim ex manuscriptis nunc primùm edita ;
Qvorvm Catalogvm Aversa pagina exhibet

Iohannis Trithemii Spanheimensis Primo, Deinde D. Iacobi Maioris Apvd
Herbipolin Abbatis, viri suo æuo doctissimi Secvndæ Partis Chronica
Insignia Dvo - I. Coenobii Hirsavgiensis, Diœcesis Spirensis: eius
foundationem & progressum ab Anno Christi DCCCXXX. vsque ad Annum
MCCCLXX. II. Coenobii ...

Trithemius, Johannes

Francofvrti, 1601

LIII [i. e. LII]. Ioannes Trithemivs Abbas Monasterii Sancti Iacobi
Herbipolensis, Bartholomæio Lescano presbytero salutem.

urn:nbn:de:0128-1-17336

IOANNES TRITHEMIVS ABBAS MONASTERII SANCTI

Iacobi Herbipolensis, Bartholomæo Lescanio presbytero salutem.

LITERIS tuis amantissime vir, quibus mihi de tua sanitate magnifice gratias agis, quid aliud respondere, aut possum, aut debeo, quam illud quod Ioannes Mesue medicus in principio cuiusdam aggregationis suæ præfatur, dicens: *Sanat solus languores Deus, & de frugalitatis solo produxit in largitate sua medicinam benedictus, gloriosus, & excelsus.* Vnde non mihi sed Deo gratiarum actiones habendæ sunt, quia sua bonitate non solum infirmos sanat, sed cum sit omnipotens etiam mortuos viuificat. Ego autem non medicum, sed monachum profiteor Christianum, cuius si quid tibi profuere consilia, ille merito benedicendus & collaudandus est, à quo totum accepimus bonum quod intelligimus. Memoriam vero mei, quam te iugiter habere testaris, cum pro peccatis meis intercedendo conuerteris ad Deum, esse mihi gratissimam scias, hoc est, vt quoties in altari sacrificium redemptionis nostræ oblatum Deo Patri omnipotenti memoriam amicorum tuorum celebres, etiam orando pro me mentaliter dicas. *Oro te Domine sancte pater omnipotens æterne Deus, per dolorem vulnerum Iesu Christi Domini nostri, memento etiam seruatoris tui licet prauis Ioannis Tritheimy abbatis, & quicquid peccauit in te, per sanguinem eiusdem filij tui misericorditer Ecclesia tua per me postulante relaxa.* Si hanc memoriam mei sedulo habueris Lescani charissime, beneficio meo quam maximo donasti. Congaudeo tibi non mediocriter, quod boni principis fauorem & gratiam inuenisti, in cuius te seruitio ita viuere decet, vt animæ profectum atque salutem nunquam postponas illecebris carnis, nec ita diligas commodum & pacem mundi, vt obliuiscaris cœlestis consolationis regni. Reditum vero meum in Marchiam sicuti promittere postulantibus cum principe amicis vobis non audeo, ita non temere nego. Potest enim omnia Deus, cuius nutum & voluntatem sequi, omnis creaturæ salus. Futurorum autem nulla mortalibus est determinata cognitio. Vale nostri memor, Herbipoli penultima Augusti. Anno Christianorum millesimo quingentesimo septimo.

REVERENDISSIMO IN CHRISTO PATRI DOMINO IOANNI TRITHEMIO

abbati S. Iacobi Herbipolens. præceptoris suo quam charissimo, frater Theodoricus monachus Fuldensis reuerentiam & honorem cum humilima sui recommendatione.

REVERENDE pater & præceptor amantissime, audiens paternitatem vestram aliam suscepisse abbatiam, & resignauisse Spanhemensem, ultra modum sum animo consternatus & fluctuans in memetipso quodammodo diuisus, & contristatus euasi, & lætus. Contristatus quidem propterea, quod inuidia æmulatorum vestrorum in tantum valere permissa est, vt vobis occasione præberet monasterium vestrum deserendi, quod vestris ingenio scriptis & libris per totum ferme orbem notum, clarum, famosumque reddidistis & insigne. Quid enim fuit monasterium Spanhemense priusquam vestra paternitas reuerenda eidem præficeretur? In obscuro latebat & in tenebris, ita vt ultra decem millia in circuitu nominis eius nulla æstimatio vel notitia haberetur. Reddidistis illud vestris lucubrationibus longe lateque gloriosum & notum, ita sicut vidi per memetipsum, qui ultra triennium sub vestro magisterio militavi discipulus, quod ex Gymnasio Parisiensi in Gallia, Louaniensi in Brabantia, Tubingensi in Sueuia, ex Italia quoque & Alemania, aliisque remotioribus terrarum locis, quæ multi viri doctissimi, Principes quoque & pontifices excitati fama nominis vestri, certatim confluebant ad Spanheim non sine monasterii ipsius comodo & vtilitate, qui omnes non hoc quidem nomine venerunt vt monasterium viderent, immo quod indubitanter tenendum est, propter te ac eruditionem tuam aduenerunt. Ornauisti etiã nouis structuris monasterium atque pulcherrimis, libris quoque & multis & preciosissimis, de quibus vehementer doleo, quod penes indoctos ingratisque monachos illos Spanhemenses debeant remanere. Lætor autem & congratulor paternitati vestræ non mediocriter, quod locum inuenistis quietum & studiis vestris conuenientem, quãuis ego consulissem potius, vt apud illustrissimum principem in Marchia mansissetis, qui vobis, vt mihi tunc videbatur, non spernendas condiciones offerebat. Benedictus Deus, qui pacem vestræ paternitati tribuit, & aduersarios vestros iam in eorum confusione dereliquit. Æstimauerunt se animam paternitatis vestræ partibus suis inflectere posse, sed minime potuerunt: & contigit vobis quod sancto patri nostro Benedicto, & Rabano quondam Fuldensi